

四庫全書

集部

欽定四庫全書

集部

天台續集卷上

詳校官中書臣張姚成

助教臣常循覆勘

總校官進士臣終琪

校對官中書臣范鏊

謄錄監生臣戴朝琛

欽定四庫全書

天台續集卷上

宋 林師蒧等 編

送張無夢歸天台山

宋真宗

混元為教合醇精視之無迹聽無聲唯有達人臻此理
逍遙物外事沉冥浮雲舒卷絕常勢流水方圓靡定形
乘興偶然辭澗戶談真俄爾謁王庭順風已得聞宗旨
枕石還期適性情玉帛簪纓非作重長謔聊復寵歸程

王欽若

天台瓊臺標竒狀赤城瀑布懸千丈中有高人混姓名
不向迷途隨得喪閑尋棋侶過清溪靜撥雲根種紫芝
八卦爐中調姹女三田宮裏守嬰兒太平天子秉乾籙
內寧外肅均百福直符受事紫微宮三捧靈文降黃屋
冲漠玄臺集九真清淨洪基化兆民祥風拂袂來幽谷
志士乘蹻朝玉宸相見開懷忘歲月因論微言鑒毫髮
萬壑流泉岍不枯四時春煦花常發却避紅塵思舊麓

空羨冥鴻歸勢速囊中御製寵行歌好與黃庭同誦讀

陳堯叟

山人之所隱臨海赤城間天台峰峩峩剡水聲潺潺絕
頂一室非塵寰忘形終日同雲間仙輶每戾止人迹絕
躋攀沆瀣挹朝味冰雪留童顏手持百首還元詩詩成
自謂人不知世人得之蹈希夷自此遊朝市皆爭識形
儀承禎以道遇明主子訓賣藥歸會稽張君今能盡繼
之冥冥孤鴻東南飛邈然不負煙霞期

錢惟演

金庭霞標雲半中
巖扉澗戶凌太空
飄飄靈氣際浮景
蟬蛻萬物乘高風
吾君當天坐環極
物色異人方側席
豈因垂釣識羔裘
不假張羅得鳧鳥
恩深况遇千齡旦
威顏咫尺隆宸盼
問政應同牧馬言
臨軒幾動猶龍嘆
方瞳玉骨本無羈
馳烟馭氣思東歸
江南芳草正無際
林下羣鷺猶亂飛
浮丘挹袂去何處
五芝向曉仙露晞
人間祕境不可識
千載宸章煥巖壁

查道

天台峻極橫海濱金庭紫洞多真人先生含道心照隣
上有羲軒為逸民玉醞深山珠在水圓折如虹難自晦
萬乘知名欲見之來謁西清頻名對亭亭孤雲本無心
琅琅仙骨時所欽牢讓賜金魚好爵俄辭堯闕復丘林
事載緹紬誠可貴跡寄煙霞愈無累還同麟鳳遇皇明
暫出巖扃作祥瑞

台嶽幽人興不凡携筇相別款柴關高情共樂皇風遠

真炁潛通浩劫間
綠綺靜聞沉俗格
榴花深引漬童顏
再聽玄旨知何日
時望片雲歸故山

初暉

閑倚天台看曙霞
自然龍漢度無涯
暫來演道明光殿
歸去乘蹻太上家
帝簡賜歌旌火棗
世人何處訪桃花
到山若赴崑崙會
還控青鸞白鳳車

紫皇宮闕羅高花
虬玉鳳圍墉城長
生曲奏昇天行
神仙縹緲喧相迎
栖真何必拋塵網
颼輪萬里時來往

張公結廬天台山赤城霞起三千丈天子好道思空峒
欲使億兆歸庵鴻鳳臺峩峩十二重先生忽造明光宮
無為清淨化可守能助羲軒致仁壽共羨乘蹻歸洞宮
他日騎龍却來否

丁謂

不逐蒲輪至惟尋蕙帳還冥鴻思物外遼鶴別人間心
與冠纓遠身將日月閑放歸銜帝澤賜對仰天顏逸躅
凌風馭高文炳象環瓊臺刻宸濠千古耀名山

馬知節

暫至朝真主却思歸舊峰只依三事布唯有一枝筇月
上當孤室風生自古松陰功從此滿何處覓遺蹤

李維

金骨一何輕瞳方鬢復清樓居隱巖桂颺馭別堦奠玉
宇藏丹訣瑠觴泛綠醕霞城中夕夢懸想在彤庭

劉筠

抗跡在叢霄談玄屢對堯風迴列子馭霞建赤城標白

石泥丹竈紅泉滌酒瓢
天章耀行色鶴態自逍遙

孫奭

笑背芙蓉闕東南望海涯
雲章藏綠蘊鶴馭拂青霞
台嶺攀新桂桃源訪舊花
鳴駒須再去莫泛客星槎

李建中

紫殿謁宸極赤城歸舊山
氣清玄鶴下語淡白雲閑
路入翠微外巖栖瀑布間
何當一携手相與話靈關

陳越

金步四八卷上
紫籍仙階貴丹丘
隱路深五圖傳祕訣
三祝契堯心
瓢飲和瓊藥
樓居接桂陰
宸歌旌有道
垂象賁中林

曹谷

幾載仙山下無機世莫分
因為天市客方識帝鄉雲
鍊氣壺中見還元海內聞
還元篇名高赤城洞
歌賜紫皇君
步逐颺輪健香隨斗極焚
何當挹蓬閣鸞鶴自成羣

曾會

九重留不住乘興返天台
青嶂未為靜彤庭應更來
御

歌編隱訣臥榻近丹臺
衣袂含香氣蓬萊醉幾回

姜嶼

鯤鵬運海涯豈復顧泥沙
龍虎常為畜乾坤不定家
玉泉生白石紫府種黃芽
此境人難到歸程自有槎

蘇為

彤庭留不住歸憶舊山頻
世路都無念心源養得真
瓊臺棲樹石碧落應星辰
幾話蟠桃熟罇前醉過春

陳既濟

暫到京城住辭堯返舊廬身耽泉石樂心向利名踈鶴
靜來華表雲閑出太虛錢塘應過日秋水滿紅蕖

趙世長

瓊臺卜幽隱金液鍊真精冰雪形容古煙霞意思清談
玄通至道養素達長生被詔離仙窟安居入帝京唐虞
迴聖眷巢許讓高名抗節辭丹陛歸心戀赤城再眠琪
樹影重聽瀑泉聲朝客多攀餞天章復贈行令猷光史
策逸態傲公卿珍重青雲外逍遙樂太平

王從益

風馭去難留將期汗漫遊入辭丹陛曉重臥赤城秋枕
畔紅霞合門前瀑布流龍車歎太帝鶴信寄浮丘醉引
青鸞曲閑披白鹿裘夜來胡蝶夢先已到瀛洲

楊億

小隱瓊臺布水邊獨披金誥味重玄晨覓化鳥趨軒室
秋鷺翻濤逐楚船養鶴七年知善舞種芝三秀舊成田
颺輪不駐勞宸眷犀管裁章與世傳

戚綸

應悔名高藏不得朝天翻喜放身歸知時多順時人話
混俗猶披俗士衣有伴指期玄鶴老無心高羨白雲飛
赤城此去全忘慮笑我塵勞未息機

夏竦

玉格功成碧詔遲御風千里款黃扉旋紆蘭珮朝丹禁
却捧雲章入翠微綠蘊星辰藏古篆絳宮龍虎閉神輝
東門日暮餘霞散南國烟晴獨鶴歸重結茅茨臨乳竇

別裁荷艾換塵衣，鸞鳳若有壺中志。從此高梧一見稀。

張復

學道探玄務，谷神辟衣踈。野見明君暫，來北闕利名地。
歸去舊山鸞鶴羣，洞壑深藏塵外士。冠裳不繫嶺頭雲，
赤城千仞幽居處。夜籟秋猿枕上聞。

錢易

暫謁明光拂斗槎，杖藜歸去赤城霞。琳宮重啓仙人室，
金闕新辭太帝家。祗自運心奔白日，何須擲米作丹砂。

雲章賜重崆峒遠還向懸岑鍊五芽

章得象

瓊臺東畔倚岩堯縹緲煙霞切絳霄門外杉松盡顛怪
雲中鷄犬自逍遙水流玉洞桃花出風過星壇桂子飄
蕙帳已空三徑在可憐猿鶴共無憐

黃震

想別岐周不記年丹丘高卧好林泉飛名已出紅塵外
放跡暫辭紫殿前虛室先輸君靜坐野雲終俟我閑眠

長歌宸翰真皇賜袖去須知世世傳

劉起

瓊臺東畔石橋西三徑無塵古木垂囊裏歌編君相賜
腹中珠穴老莊知風迴蕙帳過猿嶺月上茅堂透鳥枝
萬載聖朝高士傳何人更得效依稀

孫沖

天台山裏草堂低一到都城識面稀綺里冠裳遵漢命
許由風骨謝堯歸去時暑氣蒸船滴到日秋雲伴鶴飛

誰向薜蘿尋覓得石橋侵漢見依微

崔希範

孤雲須信少常期未作禎祥又欲歸霖雨只宜滋大旱
山川終稱養沉機夜寒故意文章險春盡平心笋蕨肥
若是蒲輪重到日讓辭牋表莫重飛

王得益

獨上仙槎汴水湄吟歸舊隱赤城西少微昨夜離丹闕
雙鳥何時到會稽策杖再尋麋鹿徑採芝重躡薜蘿梯

雲橫皓鶴翹松咲月白孤猿倚樹啼象帝真源通閻域
玄元幽趣達筌蹄玉皇歌賜恩殊厚好把貞珉刻聖題

方演

風神卓犖謫仙才暫爲吾皇薦瑞來金石再三留不住
白雲深處卧瓊臺

九重天上辭丹陛萬仞雲間卧赤城他日蒲輪再徵詔
謝安須起爲蒼生

送馮尊師歸天台

王禹偁

前日訪潘閨下馬入窮巷忽見雙石笋卧向青苔上云是馮
尊師秋來留在茲今作東南行問我堅己詩又見宋閣老亦言
師甚好欲去天台山即別長安道臺閣有羣英贈別瑰與瓊
琤然滿懷袖此事殊為榮安用徵吾句吾道方齟齬老為八
品官有山未能去束髮號男兒出處貴得宜出則同臯夔獨
立稱帝師處則學喬松決起如冥鴻誰能侶蚯蚓盤屈泥土
中師行甚可羨雲鶴無羈絆為我持此詩題向桐柏觀

天台行送施山人

郭祥正

平生樂山水聽客談天台金標摩挲浸海月瀑布涼射煙
霞開山腰噴作千巘雨潭底晝夜轟風雷諸峰巘岼護
寶剎地與世隔無塵埃仙葩靈鳥四時有石缸玉洞清
風來施夫子欲長往謝功名脫塵網況有西來老佛師
了悟無生任消長若許陶潛載酒過須駕蒼虬逐真賞

寄台州使君

舒亶

聞說天台太守家全家日日在煙霞壺中夜釀雲分潤
洞裏秋香玉弄花四郭青山連市合一江寒水抱城斜

紫芝黃鶴應相識
梅福年來鬢欲華

使君家是八仙家
不負黃菁與紫霞
麥隴童兒行竹馬
月樓鼓角度梅花
彩牋吟就雲初合
玉局棋殘月半斜
聞說握蘭消息近
星郎昨夜倍光華

盡日書齋無案牘
有時佳客上雲霞
清心自照江湖水
和氣長開草木花
千里袴襦歌不足
萬家絃管思無斜
笑談坐覺仙風遠
空卧秋山老歲華

赤城山下萬人家
隱隱煙霄隔海霞
石上仙書留鳥迹

盃中佛供落天花
參雲臺樹寒陰直
照日旌旗煖影斜
遙想鈴齋無別事
只緣風景費才華

幾夜驪珠落
郿家直疑光燄映
朝霞彩毫寫就千篇賦
紅燭纔燒一寸花
卓犖高情欲飛動
淋浪醉墨半欹斜
陽春白雪知難繼
捧對空驚袞繡華

送道士歸桐栢觀

年來遊盡海邊山
獨愛青青桐栢壇
光射斗牛腰下劍
氣吞龍虎鼎中丹
白雲千疊赤城曉
黃鶴一聲華頂寒

玉簡姓名仙約在洞天莫放酒杯乾

送友人赴天台幕

賈 汝

天台仙籍上又見姓劉人入幕紅蓮曉趨庭綵服春魚
多知海熟藥少覺山貧太守鄉儒丈何妨婉畫頻

送梵才大師歸天台

錢維演

漢苑辭千棹仙丘訪五芝汲瓶春溜滿卷袂曉雲滋望
剎青龍起觀濤白馬馳紅樓曾應制佳句咏朝綏

章得象

京寺栖禪久霞城去路長江波收積潦風信促歸艎坐
榻新蒲隱齋盂早稻香遙知掩扉處森斗萬峰傍

蔣堂

老被詩名繫此身

師以詩名多爲
士大夫往還

思山深去避人羣寶臺千尺

隔江見清磬一聲歸路聞巖上開扉燈照月庵前掃地雪

和雲終焉此是清涼處淨住無慚相國文

師建徽若經臺丞
相宋公爲之立記

葉清臣

江水望不極楊花江面飛春風自無定遠客又言歸景

勝詩逾老心冥語亦稀從來林下意為謝北山薇

高 竦

吟指建標霞南歸繼永嘉老禪心是佛新句玉無瑕乳
竇流雲液松風落粉花舊房間宴外不復夢京華

黃 鑑

城闕厭紛華山泉樂清遠瞥然浮杯歸遠思浩無極珍
篇藹晝評淨義留秦譯平生霧霞衣倏變蘭蒲色美號
寵彌天端居飽香積孤踪共鳥還惜惜避高弋煙波一

葉舟風雨兩鏗錫佛壠有幽棲
鷹房多善識把塵話空
無百慮從此息回瞻輦寺居不及莓苔石

吳遵路

高躅動京國靜緣懷故山
扁舟乘興往孤鳥倦飛還社
漏重湖外霞城積霽間
碧雲聊寓意即境自幽關

張有道

久陪譯館清流集吟苦霜添
兩領髭厭駐王城思舊隱
年來却赴白雲期

詩律密聞高九釋倦遊歸老舊烟霞朝中半是名臣友
時寄新吟壁罩紗

章珉

故山蘿蔓鎖烟扉幾夕扁舟已夢歸蓮社招賢移歲月
芝岩編句滿珠璣金刀擁雪新凋鬢香裊欺蘭舊賜衣
後夜吳門對霜月懷師餘意在琴徽

刁約

京落風塵弊客裾故山歸去有精廬綴孟應供王城久

鏤管賡吟友社餘衲擁蘭芽新賜服帙収貝葉舊翻書

師嘗待制
翻經館閣

蕭然壁觀芝巖上從此身名與世踈

吳育

幾年鉗鉢帝城栖看盡塵勞息盡機詩妙偶因餘力到
名高却與本心違雲深路入千山去歲晚身携一錫歸
林下應逢猿鶴得無驚見紫檀衣

趙槩

建刹存真意崇臺表大因中藏般若偈外護赤城神花

雨長霏晝松風自掃塵
媿心同范甯蓮社阻相親

昔遠公嘗

招范甯入社甯乃以
養親從官媿謝而已

元絳

責重憂多兩鬢斑
十年長夢赤城山
何時得似淨名子
漱石眠雲恣意閑

宋庠

玉宇重來訪舊遊
蟠桃熟徧碧城秋
不知真是仙才未
上盡黿頭最上頭

飛錫春瑤琴行行望海陰
香花上都供猿鳥故巖心
千鉢凝齋劑晨舟載梵音
庭柯舊桂子依約半春林

寄天台梵才上人

梅堯臣

嘗觀月從東方出想照石橋傍
畔人試問當年與今日
清光不改祇如新

巢禽託靜林潛魚戀深壑
豈不能自安翔泳得其樂
達士遠紛華於茲守冲寞
堂前鳴松風堂後馥花藥
好鳥時一呼澄明望寥廓
詩興猶未忘禪心詎云著
所以得

自然寧為萬緣縛未能與之遊懷慕徒有作

送梵才上人歸天台

頃余遊鞏洛值子入天台當時羣卿士共羨出氛埃
荏躄一紀却向人間來問子何為爾言興般若臺雖將
發愚闇般若安在哉此教久已熾增海非一盃我言亦
爍火豈使萬木灰蓋欲守中道焉能力損裁子勿疑我
言遂以為嫌猜忽聞携錫杖思向石橋迴城霞與琪樹
璨璨助詩才嘉辭徧人口幸足息巖隈

張瓌

往問維摩疾來探般若心本源雖自在因地亦行深

經云

行深般若灑落溪山色蒼涼竹樹陰宦途如磨蟻何日重登

臨

傅瑩

結廬深山頂遂懷安隱心安隱如之何道勝塵慮沉青
霞白雲致茂樹脩竹陰脩然北山上令人思重尋

許懋

北岫巉巉敞佛居詩翁安隱類逃虛平生節行清無玷
到老精神健有餘門俯清江軒挂月晝吟佳景夜觀書
黃山俗客嗟官縛不得梯雲款淨廬

楊大雅

忽憶幽棲地千峰秀海濱歸心挂飛瀑高迹指浮雲塵
世宜深遯詩名畏遠聞猶嗟石橋畔凡聖路歧分

宋 祁

九霞凝標倚霄極爾時師在雲山側坐中不起見諸方

滿襟天香嗅簷蔔海嶠嶰嶰萬佛螺赤髭半頷誰相過
卓錫時攀三宿樹鬪經詎著四圍駝何年擲鉢來京轍
袍縫成畦紫蘭馥王公扞席爭逢迎不意當今有平叔
第一多聞師子兒碧雲餘力嗣工詩盡把天光注言語
直將清氣入肝脾有人官冷抱窮愁坐客無羶塵影流
吃口倦談真寂寞移書避事喜旬休媿慙禪嫡來相問
亂自探懷授珍蘊已輕安仁為老聲更惱王筠賦彊韻
此來緇侶頗言文局促啁啾寧足論私地蛙鳴徒聒耳

長沙國小僅回身惟師墨海多
雄藻具足身中無欠寶
先追禦寇跨冷風後伴騷人
拾香草嗟予投報乏瓊瑰
目梯金園剝九回藍輿嬰跚
而生舉應容元亮醉中來

余良儒

卓菴臨海北山隈塵外門
歌碧嶂開宴坐靜當明月塢
高吟閑入白雲堆性歸禪
悅都無礙詩繼名賢舊有才
衰晚知師甚強健尚能真
筆惠書來

孔陶

飛錫來窮岫馳聲滿上京
衣從麟德賜詩入集仙評
虎老文彌炳松孤格愈清
投人夜光寶按劍但頻驚

皇甫泌

昔在童蒙歲學禮暨詩書
肅肅東庭訓罔敢寧斯須
積習將一紀心目多勤劬
本此修拙辭階之登仕途
得以施所學聞者謂之迂
吾道固未行或嗤為腐儒
腐誠如所云儒非吾敢居
時英賤民政亦諄官之龕
嘉言屢貽勗周旋畫偉謨
胡不事章句清貴無加于
我聞今學者

為人不自圖六朝文物壅化源由是枯華文媿不能迷
深甘守株古人不得見臨風重欷歔

又

美玉不自貴貴之者良工高材不自明明之者至公和
璞文未刻他山石正同子虛賦未行相如車不東我今
徵此詞亦將擬未通粵有空門子孕秀赤城中性靜不
欲俗詩癖俄在躬意淳自高古言雅思變風勞勞不稱
年名尚高遠聽我來山月鄉即貌知困蒙吾師道雖否

天子方文崇一旦因得意誦之于六宮

徐舜俞

方袍麟殿賜蒲茸道勝年來請謁慵貝葉罷翻雙鳳闕
石房歸掩五芝峰朝賢遠乞裁詩藁海客爭傳出定容
後代何人續僧史好將安遠比高蹤

送僧歸護國寺

丁謂

少室久傳西祖印京華時不等閑尋黃樞慕道飛書密
紫禁知名示寵深一法徧垂春雨潤羣生皆悟海潮音

南歸八桂禪庭在後夜僧懷立雪心

錢惟演

曹溪有真嗣是名大知識得法三十年堂堂坐巖石忽
狗雲壘招暫屈冥鴻翼褰裳度王城夙駕來軍壁陸泉
正持戒到漑方蔬食晨爐蒼蔔霏夜榻氎毳積金鉢稻
脂香瓊甌茗花碧高談入幽固默對探虛寂學精西竺
言詩妙南朝格與遊欣霧潤鄙吝猶泉滌遽憶五芝春
悠然理歸策伊予病且老末景如駒隙暫為中軍帥更

玷台臣席無功翊熙明何力當優績蓮社久棲心華簪
聊寄迹願辭食地封永事彌天釋

又

白道縈回徹上方薰然風信滿歸航五芝巘秀經行熟
千椽園深宴坐涼吟久半軒移海日定回諸壑散天香
忘年寶契由來厚終謝繁纓捧鉢囊

張士遜

一言已了忘筌誼諸祖休傳壞色衣隻履遠過葱嶺去

片雲高傍石橋歸海宮有請盃慵度塵劫無涯錫倦飛
元帥香燈持百載又從樞府發清輝

師本寺題樞密尚書先生所宗奉

呂夷簡

赤城千仞聳霞標聞說精藍近石橋久向天厨分淨供
忽游人海赴嘉招逾年華館留禪榻幾宿輕航兀夜潮
深媿山陰許多講肯隨支遁出塵囂

魯宗道

條來條去本無心舊國王家念正深猶喜大緣逢景運

不辭千里答嘉音
人間話道經三伏
島外棲禪指二林
留別皇都有新偈
苦將泡幻喻升沉

李維

香刹隱霞標齋房見落潮
歸思法衆繞來應輔臣
抬倚策吟雲合乘盃
呪浪銷曹溪久得法
遊戲自逍遙

李簡

來赴龍華約歸承帝澤
新道高傳幾祖言
下得何人水想靈溪
健花饒法界春自甘
鉉鈍者猶望指迷津

李 諮

輦寺住經年歸心起浩然傳衣因世出揮塵自彌天
海客分朝供江燈照夜禪赤城重到日八桂老巖烟

劉 筠

暫寄長安寺時聞寶偈傳南歸宗派盛外護帝臣賢桂
色陵庵雪芝腴助茗泉離懷杳何許鳳刹際霞天

晏 殊

海嶠黃金刹安禪不記秋來膺臣宰召歸泛越人舟達

性融三界隨緣極四流還持雙股錫拂蘚坐巖幽

李及

高迹寧留得禪心萬法空來從丹闕下去返赤城中入
舫袈裟月穿林錫杖風何時結香社宴寂與師同

李遵勗

雷海譚音出世雄台巖香社冠禪叢紅爐點雪靈機密
翠徑斑苔道步通珠水瀝羅晨漱淨豉萹紫飭午齋豐
歸帆已應王臣供金地天龍繞舊宮

錢易

拂衣台嶺舊林泉
命服蘭芽奪目鮮
一念不居常在定
十分無阻盡安禪
霜含庭栢依稀老
月到經窻暗澹圓
蟻枕沉迷難話別
半橋衰柳鎖寒煙

宋綬

台嶺分燈契上機
政庭傳教及禪扉
供開蒲饌持盃至
夢憶霞標振策歸
吟硯自澄晨磬徹
經窻閑掩夕香微
袍紋迥奪巖芝色
貌座人天喜重圍

祖士衡

雪中問法傳宗印日暮裁詩變楚騷香積諸天修淨供
蒲茸三殿賜新袍夜禪錫駐青鴛刹曉渡杯陵白鷺濤
參罷虛堂惟宴坐風松露桂海蟾高

張師德

喜陪人傑論三乘巖室經年鎖翠稜六代有師傳法印
萬緣無象監心燈赤城道遠明霞晝瀑布聲寒月照冰
跡似孤雲縻不得清秋歸興杖蠻藤

馮元

南宗開士共推賢
語默忘機合自然
上國經遊雲出岫
故山歸去鶴冲天
艤舟却拍靈溪岸
烹茗還資瀑布泉
宴坐草堂諸念息
只應餘習在詩篇

丘雍

蕭昂矚餘輝
堯天命賜衣
石房雲外啓
金錫日邊歸
草腐螢光散
星中暑氣微
抽簪期晚歲
相許扣禪扉

石中立

振錫來京輦薰蘭近賜衣種蓮曾結社指栢迥投機舊
寺千巖隔歸艘片席飛禪心天海外永夕望台輝

黃宗旦

一餅一鉢是生涯來扣樞扉帶礪家寵服降從丹鳳闕
禪房歸掩赤城霞五芝巖下傳心印八桂峰前散雨花
還伴白雲重到此會看恩館築堤沙

章得象

京塵拂盡一囊輕歸思飄然入杳冥五兩風高飛榜急

八重山秀倚天青
供花林鳥窺禪熟
聞呪潭龍起蟄醒
他日可容攀社侶
籃輿終待叩松扃

錢景臻

天台多勝槩
滿目亂山青
不似三峯好
樓臺入翠屏

送僧歸天寧萬年禪院

錢惟演

絕巘依滄海
疑君際紫氛
巖扉晴落雪
寶地晝生雲
淨饌芝房秀
深爐桂葉薰
宰官遊未得
空愧北山文

楊億

暫別雲山幾度瓜方袍初日曜蘭芽吟詩池上生春草
說法庭中散寶華桂檝去依隨岸柳松軒歸賞赤城霞
御書滿篋新頒得應向三吳到處誇

李宗諤

師住天台寺天台水石幽眼前皆勝境門下盡名流法
號君恩賜精藍國力修渡杯來鳳闕振錫謁珠旒內殿
從容對神都委曲遊高僧類雲鶴歸思在林丘御札全
編得宸毫幾處收遙思到時節煙樹赤城秋

梁鼎

談空玉殿君恩厚歸興蘭舟澤國賒
禪室冷思滄海雪吟樓晴憶赤城霞
經吳屐滑當梅雨到寺衣香近桂花
深愧塵纓未能去石橋煎瀑共嘗茶

陳充

朝天來詣觚稜闕傍海歸尋瀑布峰才大不慙師號美
道高翻訝帝恩重問程行冒江村雨寄宿吟聽水寺鐘
到日依依賞清景石橋雲月滿杉松

吳淑

偶攜筇杖辭青嶂
便賜蘭芽染紫衣
城闕暫隨明月至
江湖還共白雲歸
樓中夕照山川秀
盤裏春蔬笋蕨肥
我為浮名閑未得
他時蓮社願相依

田錫

帝里來朝謁林泉
却憶歸得詩從史
閣掃石向巖扉雲
伴離丹闕猿窺換
紫衣天台壽昌寺
山水有光輝

劉少逸

道高塵俗住應難携錫東歸暑未殘紫殿已承新雨露
白雲終憶舊峰巒孤村路僻牽吟遠峭壁泉飛入夢寒
滿篋御書并御札到時松院與誰看

安德裕

跡自青門遠田衣賁在躬舊房千嶠外歸棹五湖東地
力薑畦沃年支芋盎充從支乃榮道一與祖心同

孫旦

詔到禪關日願言高古今幾生傳佛法方得契君心結

坐觀宗社恩容返道林立身名了也何處更追尋

招桐柏李道士

葛 閱

海嶺重重接紫虛高人還肯啟仙裾玉蟾點滴有清露
少費研朱寫道書

贈台倅徐太博

僧長吉

瓊樹聳芳蕤靈根植仙圃懿哲蘊英才妙歲冲雲路曲
臺峻清秩莪冠凜竒趣霞城倅郡條惠愛春榮布心陂
萬頃澄羣物欣翔鶩浮雲擯繁慮虛舟遊太素庾樓明

月情謝塘春草句沙鳥下琴軒江風起廳樹顛昂出俗
操益為時賢慕異日柏梁遊淵雲讓孤步

贈郡紉陳員外

耿介蘊國器茲焉紉郡綱清規稟詩禮華閱聯簪裳才
刃挺銛利心鑑涵輝光盤錯無以壅姦邪固難藏民寃
積已雪吏局清如霜彈雀費明月補履煩干將火烈金
益鍊雪深松愈蒼英聲久馳騫壯氣方激昂凝流嗣洪
業百辟升賢良孰知隱鵠志即起摩天翔

寄天台王鍊師兼呈邑宰

張日損

百里淒清古縣城
阮郎陶令自相應
非無柳影含彭澤
別有花光勝武陵
閑醉想同莎外石
冷吟知共夜深燈
紅塵未得尋高興
心過青山第幾層

承旨尚書和梵才大師秋興十章出於傑筆句奇
格老且有來命俾之次韻哀思久涸蕪音僅足
誠不堪附哲匠之末姑以尋梵才之舊亦各見

志耳

胡宿

古有悲秋篇遠行第三句人情重辭家客意倦長路征
馬陟高崗栖鳥集喬樹慘澹層陰生呼號勁風怒匣琴
徒自攜杯酒與誰遇衣帶緩於前衣香非復故

右遠行

旻宇斗澄霽池臺始登臨幽芳無艷質爽籟有真音閑
雲乍明滅寒鶴忽浮沉青山晴好望白道細可尋踈蟬
鳴急管跳鯉應鳴琴微風獵椒桂快哉一披襟

右游矚

嚴霜霑百草不問菊與蘭行觀秀色委坐使芳意殘有
酒聊自把無萱良鮮懽安得青精飯為駐顏如丹

右雜興

勁氣初折膠奔書聞插羽寒金刁斗鳴夕火兜零舉霜
威畫角雄月思清笳苦驃騎出鏖兵輕車前耀武一鼓
奪先聲三捷獻英主天山挂彫弓玉塞休強弩龍額近
封侯華堂盛歌舞

右邊思

農家秋物成腰鎌刈新穀得食雞豚肥飽霜梨棗熟牧
童唱田歌孺子宰社肉野老醉亦謳愛此義皇俗

右田舍

高秋感慄慄中夜起盤桓啼螿思月底哀鴻杳雲端遺
蜩尚號節初鳴早催寒新霜霑客鬢淒風入人肝拂枕
了無寐取琴不能彈壯圖成齟齬老淚空汎瀾逢辰今
匪易行志古良難

右感懷

乘秋尋遠壑偶到幽人家濁醪釀秫米香飲炊胡麻微
徑捫蘿薦高峰弄雲霞餐和殆忘返落景半規斜

右山中

鬱陶倦煩暑爽豁逢蕭辰開樽有歡伯傾坐得嘉賓雕
盤薦肥羜寶刀贈霜鱗清談屏世務善謔到天真須言
燭可繼莫訴盃行頻至道諒在已物外不關身

右醮集

陰蟲思哀草羈雌啼空林盛秋授寒服獨夜擣清砧影

孤隨月瘦肌薄怯霜侵平生托義分夢想存容音山頭
憐化石陌上重辭金安得兩黃鵠因之傳此心

右怨思

秋意自不適况復登河梁眷言送歸客徙倚見斜陽雜
佩解席上斑駁嘶路傍風雲感素節絃筦思清商菊殘
餘老蓋蕙晚非新香何以致叩叩臨行持一觴

右送客

中山廣軒

何執中

曲檻小欄干登臨咫尺間望隨流水遠高共白雲閑亭
栢僧歸路江風客渡灣覺來生羽翼疑是夢中還

陸長倩

凌虛雲磴陟崔嵬軒檻仍從絕頂開
邑屋萬家迷向背江流三面自縈迴
金山每恨波濤阻星石曾登培塿來
為是會稽東部郡不教更號小蓬萊

葛閱

勝地藏東閔巖城聳二岑萬燈迎日早
孤磬出雲深雪

霽茗初試雨涵山半陰茲焉即方廣有路到天心

胡宗哲

昔人亭榭久荒殘今復高軒峙翠巖眺望可周千里景
宴遊非止一時歡樓臺遠近看如畫日月高低轉似丸
最好使君登覽罷夕陽羣騎簇雕鞍

徐億

勝景更新數步間北山遊得對巔峴凭欄愈覺雙峰峻
極目無涯六幘寬特出喧卑資曠達所臨高遠壯遊盤

炎蒸此地為清暑莫厭攀躋磴道難

劉握

天邊登覽處雕檻俯層岑山到三吳盡江連百粵深柳
烟含晚色花雨伴春陰騷雅知多助清虛在賞心

寄題淨名庵

宋祁

故人詩未報恨恨復經年夢去長江路心知寶所天身
依巖桂老詩與暮雲傳無奈纓綉累猶乖方外緣

又

名高身愈隱孤錫倚巖扃園布黃金地臺藏白馬經庵
雲吞暝燭澗月瀉虛瓶坐想谿橋路莓苔又幾青

登般若臺懷吉上人

周延雋

社友半凋零巖棲門晝扃松堆談廢塵貝壞譯殘經蝸
繞篆餘壁鳥還參後庭了應身是幻頽思劇冥冥

又

幽致極東南青陰潤客杉林深纔辨徑雲滿欲藏巖琴
想山猿伴花曾谷鳥卽孤標如可挹墜藁悵開絨

題明慶塔院

章得象

步步雲梯徹上層
回頭自覺欲飛騰
頻來不是雲中客
久住偏宜物外僧
下寺鐘聲沈海底
前峯塔影落堦稜
凭闌未盡吟詩興
却擬乘閑更一登

孔洵

古寺尋清賞
梯雲出薜蘿
舉頭知日近
極目得天多
別嶂千屏列
長江一帶過
常聞淨居境
况此復如何

題順感院觀閣

趙企

一上危梯一解顏重岡複嶺四周環山川盡出登臨外
天地都歸俯仰間飛鳥直隨雙目斷遊雲長與片心閑
文書了却無餘事日午須來日落還

遊兜率

一到中山眼界寬招提直在翠微間黃鸝過處金穿柳
白鷺飛時雪點山漁艇兩三隨月上海帆八九趁潮還
歸時聽得梅花角日落西城未掩關

寄題不流軒

黃裳

本來有安在無流亦無止有流落色界無流在空體體
用常合并見否證而示空色兩相忘有無還自爾月明
孕澄寂山寒卧清泚一葉天際歸歌聲聳吾耳倚闌誰
得知超然絕塵子

題元象大師房

陳白

鷺行飛起綠楊岸漁笛吹殘明月灘一片畫圖收不得
何人終日倚闌干

題永慶覽勝亭

丁注

插迥飛簷聳凌虛疊砌危四天欄下揖萬象掌中窺目
力不到處雲容無盡時塵塵皆勝事凭檻幾人知

張景脩

衙城直上有煙巒亭在懸崖絕壁間幾箇白頭忘歲月
一生青眼看江山秋風落木樓臺出暮雨籠沙鷗鷺閑
珍重京西繡衣使作書題榜許追攀

題北山松軒

趙企

萬木有榮謝此松無盛衰夢闌秋韻起碁罷午陰移般

匠顧不顧秦君知未知亭亭高節在者取雪霜時

張景脩

雪天蒼翠暑天風珍重僧軒十八公不是詩人少吟咏
世間花草易為工

石公弼

稍雲阻日引清風抱石盤根造物工凌厲四時同一色
不知何歲植巖中

左知徵

堂堂老龍根挺秀依牕壁風煙歲月深滴翠潤幽石時
引琴瑟清冷然動吟臆明堂如度材豈惜破濃碧

謝梵才惠茶

石待舉

郡園名卉製猶新分惠眠雲跂石人色鬪瓊瑤因地勝
香殊蘭芷得天真開時好對稜稜月

李衛公謝茶詩有
開時微月上之句

碾處應飛瑟瑟塵寄語高僧宜鄭重能詩方遣雨前春

薛許昌茶詩云類有

詩情合得嘗之句

遊嘉祐院登般若臺

石公弼

縈回巖岫擁高樓
飲海擎雲走翠蚪
欲問此臺名般若
一輪明月照中秋

題竹軒

吳 亶

虛室澄心近竹開
雪中無事共徘徊
不須翠柏庭前見
自有清風座上來
林小未宜輕瘦節
歲寒方可看高材
支公適好誠何在
豈謂香嚴擊後雷

黃 遠

隱隱招提地
幽軒無點埃
惟栽紫竹種
相伴白雲堆
踈

影月移轉清聲風送來居常稀俗客貝葉此勤開

張景修

種竹纔添十數竿題詩已僅百餘篇有時碎影搖金地
盡日清風伴玉泉不與愛魚人把釣肯教騎馬客求鞭
平生最喜此君子一洒何當聽雨眠

方洵武

勁節孤根得地深清虛誰識子猷心當時不是琅玕種
月下何由聽鳳琴

題玉泉

楊傑

白雲山下泉幾年石中韞但見玉色明孰能究源本

黃玠

水性能方圓泉色常珪璧雲山靜有輝瓊液來無迹泉
上修禪人曹溪分一滴鑑上更澄源紛紛萬綠息

張景修

長疑數尺玉乃是一方泉粉色和雲汲茶香帶石煎鑑
來誠美矣聞處合鏗然白首惠山客也須吟此篇

釋仲殊

分出瑤池萬怪驚崑墟引落最高層十分清是泉中玉
一漱寒生齒下水淨照更無雲影雜素光疑有露華凝
莫教明月從中現澈底無心伴老僧

題希夷堂贈周道正

王珣

仙骨清冷道氣濃餌芝深隱括蒼東醉遊鼇頂三山綠
吟對神爐九轉紅千古遺音生指下一天星斗在壺中
蕭然不許塵埃到顧我頻來興未窮

周延雋

鶴骨瘦來輕年侵髮尚青
仙期投玉刺地界接金庭
食採芝苗秀書探藥笈靈過
從聊晤語浮跡悵如萍

寄題亭池兼贈呂道正

羅適

太一仙人天上來口傳丹訣
養真胎赤城道士誰堪論

白髮先生或姓回

呂洞賓先生常稱
姓回以混於俗

牕外方塘幾畝蓮花開料亦似常年
先生齒齒香中坐應有人呼作水仙

題白雲軒

余元

不作從龍意無心謾出山可憐一片雪長伴主人閑

遊白雲軒贈沖一道正

葛閱

無事之時無事身天將沖淡養吾真
鴟鵂啄腐成滋味
豈識朝霞吐噉人

寄白雲軒周道正

李東

自往丹丘去因循過一年孤雲無定止
明月又重圓
書尾閒相問琴聲淡悄然何時當會面
吟醉海濤邊

題白雲環翠亭

楊傑

龜甲屏風面面開
天台連接至蓬萊
簷前朝暮碧雲客
時有一聲清磬來

葛閱

六月好風吹玉琴
地浮鼇海越山深
愛師終日無餘事
一點塵埃不受侵

題清暉堂

劉宗孟

曙光倫紫翠
秋氣莫爭青山
近嵐同潤堂
虛日共生斷

霞雲去接夕照月來迎翻想鮫人室珠盤亦讓明

葛閣

歸老雲邊一翠岑靜中觀動照人心豁湖北上又東去
不似青山無古今

長吉

結廬江上棲江雲日為侶江山相掩映清輝滿庭戶沙
暝見歸禽潮回聞去櫓落景一簾風殘雲半江雨中餐
吸露葵午坐烹茶乳少室傳花旨南華齊物語隱几贖

淵源篆香隨玉麈愛此坐忘歸東峰月華吐

遊栖霞宮

龍虎丹砂煉已成方瞳綠髮仙骨輕石床半醉海月冷
芝軒長嘯天風清時泛綠觥陪俠客未騎赤鯉歸蓬瀛
朝簪相訪惜回馭屢奏瑤琴太古聲

張奕

尊師乃高道有意出塵寰佩劍丈垂斗橫琴意在山靈
龜調浩氣醇酒發朱顏最得時賢許詩牌滿棟間

張景修

偶先諸邑過栖霞恰費盧仝七椀茶此會果然成邂逅
轉相尋覓到仙家

羅漢閣煎茶應供

葛閱

山泉飛出白雲寒來獻靈芽秉燭看俄頃有花過數百

三甌如吸玉腴乾

閣上四座畫陰深遠處即持火炬照之
是時有茶花數百甌或六出或五出而

金絲徘徊覆面及蘇盤金宮
無碍三尊盡乾皆有飲痕

劉珵

寶爐香散曉煙寒淨几供茶遶座看已愛六花金縷異
更驚三啜翠痕乾

舒亶

薦盡春園曉焙寒靈蹤留待使君看寒泉冷結花紋細
玉椀香收雪點乾

題寧國院十全堂

方洵武

盧扁不世出死生非在人草木孕妙理金玉潛至神用
之固有序品制非君臣世之挾術者不啻空中塵悉以

利自售幽枉何由伸韞公藥之師所得無非真構堂備
觀寂榜墨如堆雲再味維摩言深閔芭蕉身我病衆生
病當推病之因諸幻起諸妄勿藥常欣欣

張景修


醫莫以人試藥能生死人十失為一次望而知謂神嘗
聞秦醫和診君知其臣豈無肘後方埋沒隨埃塵韞師
以愈疾猶如臂屈伸華它醫之良思邈醫之真誰能不
服藥一一如朱雲斯堂名十全全人亦全身方公諧藥

性勇退蓋此因金玉不足寶人生繫悲欣

題勝光怡道軒

陳白

了了無凝滯誰人知此心開池待海月種樹宿沙禽
白雪盈青簡古風生素琴由來大隱者何必在山林



天台續集卷上